

# «Il tipic Sursilvan ei memia mudests»

David Flepp da Dardin ei responsabels pil program da fiasta da giubileum da 50 onns Regiun Surselva

CUN DAVID FLEPP  
HA SUSI ROTHMUND / ANR DISCURRIU

■ **La Regiun Surselva festivescha 50 onns ed envida sonda ad ina fiasta populara cun program variont a Glion. David Flepp, pedagog da teater, e sia dunna Annadora Friberg, magistra da formaziun creativa, ein vegni engaschai dalla Regiun Surselva sco responsabels pil program da fiasta.** L'Agentura da novitads rumantscha ha discurreiu cun *David Flepp* (42) davart sia incumbensa e la sfida da realisar in program variont attractiv pil pievel sursilvan e pils hosps. Interessanta ei era sia descripziun dil tipic Sursilvan e dalla tipica Sursilvana, duas figuras che vegnan dil reminent a giugar in' impurtonta rolla ella inscenaziun «il tun dalla Regiun» che vegn mussada sonda a caschun dil di da fiasta. Quella ei vegnida scretta da Flepp e sviluppada vinavon ensemen cun in actur ed ina actura.

*Vus haveis giu success cul spitachel «Ob Tavanasa» igl onn 2015 e sin fundament da quei era survegniu l'incarica sco responsabel pil program da fiasta a caschun dil giubileum da 50 onns Regiun Surselva. Co giudicheis Vos quei engaschament?*

**David Flepp:** Igl ei ina interessanta incumbensa. Las empremas sesidas conceptualas han giu liug il november 2016. Dapi lu luvrein nus vid la programaziun e realisaziun dalla fiasta. Jeu hai astgau collaborar cun massa differentas persunas sco per exempel il menader dil Center da formaziun Surselva (CFS) *Peter Kreiliger*, divers scolasts dalla Scola media propedeutica ni era dalla Scola vinavon, musicists ed artists e cun numerusas scolaras e numerus scolaras dalla Scola propedeutica (FMS). Quei ei d'ina vart fetg interessant e dall'otra vart era ina gronda sfida da comunicar e coordinar la lavur cun tons involvai.

*Per motivs da lavur essas Vos dabia da viadi ed enonuschis bia loghens dil Grischun e dalla Svizra. La Surselva enonuschis Vos quasi sco il sac dallas caultschas, tgei muntada ha ella per Vos?*



FOTO © WILFRIED-DECHAU/NOSSAPUNT

Jeu sun in affon da cheu. En Surselva sesentel jeu bein, igl ei fetg bi e nus havein tut. Mo jeu sundel era bugen en auters loghens, damaneivel ni el lontan. Ei fuss romantisau bravamein e surfatg sche jeu schess che la Surselva seigi il pli bi liug dil mund. Jeu hai habitau quater onns a Basilea e leu eis ei era fetg bi.

*Cun Vossa dunna e Vossa poppa vivis Vos dapi entgins onns a Dardin. Ei la Surselva in liug ideal per viver cun ina famiglia giuvna? Dat ei cheu avunda perspectivass?*

Gie, en Surselva havein nus segir in avegnir. Magari drov'ei denton la promtadad da slargar empau il horizont e dad esser prompts da sorprender lavurs da divers geners e buca sefixar memia fetg sin estructuras ch'ins manegia ch'ei seigien dadas. Jeu hai il cletg da saver cumbinar

mia lavur cun il bi pensum da mirar da nossa poppa e sorprender lavurs da casarin, aschia che era mia dunna sa luvrar parzialmein en siu mistregn.

*Ei vegn denton savens tugnau ch'il potenzial maunchi en Surselva.*

Da miu avis havein nus tut e fetg bia potenzial ei avon maun. En emprema lingia ina bellezza natira, lu nossa cultura, igl artisanadi e mistergners da qualitat. Jeu crei denton ch'il problem ei che nus essan buca propi pertscharts da tut quei potenzial e che la confidanza ellas atgnas qualitats e fermezas maunca. Aunc pli fetg maunca denton la curascha e perquei havein nus empau mizerias da trer a nez tut las rihezias che la Surselva porscha. Igl ei buca falliu da studegiar e ponderar, mo magari fuss ei meglier da far guotas cun tgau e colla-

borar empau dapli per unir las forzas. In exempel ei il turissem ni ch'ins sa era entscheiver cun caussas pli pintgas sco per exempel in project cultural. La Regiun Surselva ei in bien exempel che muossa dapi 50 onns con impurtonta ed efectiva che la collaboraziun ei.

*Il motto dallas festivitads da 50 onns Regiun Surselva ei «il tun dalla Regiun» ed era il teater porta il medem tetel. Tgei historia raquiteis Vos cun quei toc?*

Jeu less buca tradir memia bia. Las duas figuras senunnan Sursilvana e Sursilvan ed ein per aschidadir prototips per in tipic Sursilvan, ina tipica Sursilvana, ed els raquantan ina historia ord il mintgadi. Quellas duas figuras ein il fil tgieschen e meinan igl aspectatur atras il toc che viva fetg dalla musica da treis formaziuns dalla Scola da musica Surselva.

*Co ei lu il tipic Sursilvan propi?*

Gliez ei buca sempel da descriver – jeu improvel inaga: El ei in Romontsch ni in Gualser ni forsa era setratgs neutier. Il tipic Sursilvan ei catschadur, fa part dad in chor ni suna cun ina societad da musica ni ei en in'uniun sportiva. Bugen romantisescha el enqualga l'atgna regiun e descriva ella sco pli bi liug dil mund. Quei tipic Sursilvan ei memia mudests, gie magari ha el perfin ina falida mudestadad ed el ei buca fetg curaschus e savens empau reservaus. Ed el ha quei «tgau dir».

*Quei fuss la descripziun digl um, e tgei tip ei la tipica dunna sursilvana?*

La tipica Sursilvana ei nuncumplicada, luvrusa e cunscienziosa. Ella sa tgei ch'ella vul e tuttina schess jeu ch'ella seigi aunc buca propi emancipada. Aunc oz smarveglian per exempel bia persunas sche jeu ditgel che jeu stetti a casa e miri dalla poppa e fetschi il casarin. La tipica Sursilvana ei era pulit reservada e sco il tipic Sursilvan eis ella mudesta.

*Essas Vos in tipic Sursilvan?*

Gliez lasch jeu bugen giudicar ils auters.

## ■ MUSTÉR

### Prelecziun da Flurin Jecker

(anr/hh) Mesjamna, ils 27 da settember 2017 porscha la Biblioteca populara Mustér ina prelecziun ed ina discussiun cugl autur *Flurin Jecker*. Il giuven scribent da Berna cun ragschs romontschas prelegia ord siu emprem cudisch cul tetel «Lanz». Il cudisch tracta la veta d'in giuven da 14 onns che ha tut, mo tuttina buc il principal. El scappa da Berna ed arriva tier ses parents a Mustér. Igl autur *Flurin Jecker* ha studegiu biologia e lavura sco schurnalist independent per la gasetta «Der Bund». La primavera 2016 ha el terminau il studi en litteratura agl Institut per litteratura svizzer. Sia lavur finala ei il roman «Lanz» staus. Igl arranschament ella Biblioteca populara Mustér el plaunterren dalla casa da scola a Cons entscheiva allas 20.00.

### Dal batten fin la mort

■ (rtr) La Regiun Surselva festivescha il giubileum da 50 onns. Ils uffizis regiunals en centralisads a Glion, tranter auter era l'uffizi da stadi civil. *Silvia Caviezel* da Vrin, collavuratur da l'uffizi da stadi civil, lavurava gia avant 20 onns en la medema funcziun; l'entschatta dentant tar l'uffizi da stadi civil da la vischnanca da Vrin. Da quest temp vegniva tut anc scrit a maun. L'incumbensa da lavur era 17% (dasperas fascheva el il pur), oz saja quai 190% per l'entira Surselva. Gia avant 20 onns avevan las vischnancas en la periferia da cumbatter cun il problem da paucas naschientschas. A Vrin avevan els schizunt naginas naschientschas da lez temp.

La gronda lavur era ch'ils burgais stuevan vegnir enavos en lur lieu nativ sch'i deva successiuns d'ierta. La lavur dad oz saja vegnida – almain per part – pli cumplitgada, surtut tar cas cun persunas da l'exteriur. In pau lavur dettia er il contact cun requirents d'asil. Sch'in uffant naschia hajan els savens nagins documents. Ina bella lavur sajan las nozzas civilas, di Caviezel. Pli baud era quai plitost ina chausa formala cun suttascriber venderdi saira ils documents. Oz saja quai sa midà damai ch'ina gronda part na maridia betg pli en baselgia. Perquai fetschia l'uffizi da stadi civil ina cerimonia in pau pli simpatica e famigliara cun flurs e musica.

reclama



## Der Fielmann in der Stadt erspart den Preisvergleich.

Fielmann zeigt Ihnen die ganze Welt der Brillenmode – zum garantiert günstigsten Preis. Denn Fielmann bietet Ihnen die **Geld-zurück-Garantie**. Sehen Sie das gleiche Produkt noch 6 Wochen nach Kauf anderswo günstiger, nimmt Fielmann die Ware zurück und erstattet den Kaufpreis.

### Moderne Komplettbrille

mit Einstärkengläsern, 3 Jahre Garantie.

CHF **47.50**

### Sonnenbrille in Ihrer Stärke

Metall oder Kunststoff, Einstärkengläser, UV-Schutz, 3 Jahre Garantie.

CHF **57.50**

www.fielmann.com

**fielmann**

**Brille: Fielmann.** Internationale Brillenmode in Riesenauswahl zum garantiert günstigsten Preis. Mehr als 700x in Europa. 38x in der Schweiz. Auch in Ihrer Nähe: **Buchs**, Bahnhofstr. 39, Tel.: 081 750 52 52; **Chur**, Quaderstr. 11, Tel.: 081 257 07 80; **Rapperswil**, Untere Bahnhofstr. 11, Tel.: 055 220 13 60. Mehr unter **www.fielmann.com**